

四庫全書

集部

欽定四庫全書

集部

江文通集卷一

詳校官監察御史_臣曹錫寶

檢討_臣何思鈞覆勘

總校官庶吉士_臣何思鈞

校對官中書_臣吳裕德

謄錄監生_臣范光謙

欽定四庫全書

集部二

江文通集

別集類一 梁

提要

臣等謹案江文通集四卷梁江淹撰淹字文通濟陽考城人仕齊至冠軍將軍吏部尚書入梁為金紫光祿大夫封醴陵侯謚曰獻事迹具梁書本傳淹自序傳稱自少及長未嘗著書惟集十卷考傳中所序官階止于中書

侍郎核以史傳正當建元之初則永明以後所作尚不在其內今舊本散佚行于世者惟歙縣汪士賢太倉張溥二本此本乃乾隆戊寅淹鄉人梁賓以汪本張本叅核異同又益以睢州湯斌家鈔本參互成編汪本闕知已賦一篇井賦四語銅劍讚一篇詠美人春遊一篇征怨一篇張本闕為蕭某拜太傅揚州牧表一篇此皆補完他如待罪江南思北歸

賦張本無題首四字尚書符張本題下闕夾
註起都官軍局符蘭臺八字為蕭某重讓揚
州表中任鈞符負圖之重句張本脫符字為
蕭某讓太傅相國十郡九錫表首張本無備
九錫之禮五字上建平王書末汪本脫此心
既照死且不朽八字亦均校正其餘字句皆
備錄異同若雜擬詩序中芳草寧共氣句此
本訛氣為棄之類小小疎舛間或不免然終

較他本為善也乾隆四十三年三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

江文通集卷一

賦

學梁王兔園賦

有序

梁 江淹 撰

或重古輕今者僕曰何為其然哉無知音則已矣聊為
古賦以奮枚叔之製焉

碧山倚巖崎兮象海水碣石朝日晨霞兮赭紅壁仰望

沈寥兮數千尺，硃硬嶮岷汨，湍成岫，豁呀而窟竇，哮礪礪，確紫蕪，丹駁苔點，綺縟若斷若續，如此者百有十處，奔水激集，潏溟絜渠，滴湟吐吸，跳波走浪，濺沫而相及，湍漾長驚，澆灌遠注，無時息焉，青樹玉葉，彌望成林，亦有輪囷礪碗，一枝百頃，萬葉共陰，縹草丹蘅，江離蔓荊，酷郁交布，原滿隰平，於是金塘涵演，綠竹被坂，繚繞青翠，近而復遠，白砂如積雪者焉，碧石如圓玦者焉，水鳥駕鶩，鷗鷺鴻鴈，上飛衡陽，下宿沅漢，十十五五，忽合而

復散乃有綺雲之館頽霞之臺其樂足以棄國釋位遺
死忘歸也若夫墨翟商瞿之倫學兼師術才參道真方
駕連軫于沼之濱乃射宿餌魴前繳鸕鷀青黏黃梁臠
鼈截羹臠狔柘漿窮嬉極娛雲翺兮烟翔超然左覽蒼
梧右睨鄧林崩石梧岸岵藏陰逮至山頂丹壁四平
靈木夾道神草列生俯瞰太一下視流星既投冠而棄
劍亦抗魄而盪靈於是大夫之徒稱詩而歸春陽始曉
朱華未希卒逢邯鄲之女蕙色玉質命知其麗攢連映

日綺裳下見錦衣上出雖復守禮令人意失遂謠曰碧玉作椀銀為盤一刻一鏤化雙鸞乃報歌曰美人不見紫錦衾黃泉應至何所禁妃因別曰見上客兮心歷亂送短詩兮懷長嘆中人望兮蠶既饑躑躅暮兮思夜半

青苔賦

有序

余鑿山楹為室有苔焉意之所之故為是作云

嗟青苔之依依兮無色類而可方必居閒而就寂以幽意之深傷故其處石則松枯交陰泉雨長注絕礧俯視

崩壁仰顧悲凹嶮兮唯流水而馳驚遂能崎屈上生班
駁下布異人貴其貞精道士悅其迴一作趣咀松屑以

高想捧丹經而永慕若其在水則鏡帶湖沼錦匝池林
春塘秀色陽鳥好音青郊未謝兮白日照路貫千里兮
綠草深廼生水而搖蕩遂出波而沉滛假青條兮總翠
借黃華兮舒金遊梁之客徒馬疲而不能去兔園之女
雖蠶饑而不自禁至於脩臺廣廡幽閣一作闔閒楹流黃
以織琴瑟且鳴戶牖秘兮不可見履袂動兮覺人聲廼

蕪階翠地繞壁點牆春禽悲兮蘭莖紫秋蟲吟兮蕙實
黃晝遙遙而不暮夜永永以空長零露下兮在梧楸有
美一人兮歎以傷若廼崩隍千仞毀冢萬年當其志力
雄俊才圖驕堅錦衣被地鞍馬耀天淇上相送江南採
蓮妖童出鄭美女生燕而殞死艷氣於一旦埋玉玦於
窮泉寂兮如何苔積網羅視青麋之杳杳痛百代兮恨
多故其所詣必感所感必哀哀以情起感以怨來魂慮
斷絕精念徘徊者也彼木蘭與豫章既中繩而獲夭及

薜荔與蘼

一作蘼

蕪又懷芬而見表至哉青苔之無用吾

孰知其多少

蓮花賦

有序

余有蓮花一池愛之如金宇宙之麗難息絕氣聊書竹
素儻不減焉

檢水陸之具品閱山海之異名珍爾秀之不定乃天地
之精英殖東國之流詠出西極而擅名方翠羽而結葉
比碧石而為莖蘼金光而絕色藕冰折而玉清載紅蓮

以吐秀披絳華以舒英故香氣感俗淑氣參靈躑躅人

世茵蔕祇冥青桂羞烈沉水慙馨於是生乎澤陂

一作波

出乎江陰見綵霞之夕照覲雕雲

一作龍

之晝臨既翕艷

於洲漲亦映曖於川潯奪夜月及熒光掩朝日與葩火
出金沙而延曜被淥波而覃拖冠百草而絕羣出異類
之衆夥故仙聖傳圖英隱流記一為道珍二為世瑞發
青蓮於王宮驗奇花於陸地若其江淡澤芬則照電爍
日池光沼綠則明璧洞室曜長洲而瓊文映青崖而火

質或憑天淵之清峭或殖疏圃之蒙密故河北權歌之

姝江南採菱之女春水厲兮楫潺湲秋風駛

一作駛

兮舟

容與著縹芰

一作菱

兮出波擘相蓮兮映渚迎佳人兮北

燕送上客兮南楚知荷華之將晏惜玉手之空佇廼為

謠曰秋雁度兮芳草殘琴柱急兮江上寒願一見兮道

我意千里遠兮長路難若其華實各名根葉異辭既號

笑渠亦曰澤芝麗詠楚賦艷歌陳詩非獨瑞草爰兼上

藥味靈丹砂氣驗青曠乃可棄劍海岫龍舉雲峯畫臺

殿兮霞蔚圖縑繡兮炳燦永含靈於洲渚長不絕兮川壑

丹砂可學賦

有序

或

一作咸

曰金不可鑄僕不信也試為此辭精思云爾

惟雲塲之少折乃人逕之多憂雖瑤笙及金瑟雜翠帳
與丹幃吞悲欣於得失銜哀樂於春秋煥如星絕黯如
火滅星絕難光火滅可傷故從師而問道冀幽路之或
暘測神宗之無緩踐雲根

一作極

之不賒訊名山及石室

驗青汞與丹砂搗五難之重滯擘九仙之輕華故抱魄
寂處凝神空居泯邈深晝窈鬱重虛覘炫耀而可見聽
沈寥而有餘於是乘河漢之光氣騎列星之綵色輟陰
陽於形有傳變化於心識浮恍惚而無涯泛靈怪而未
極架日月之精照騫蛟龍之毛翼遂乃氣穆肅而神奔
骨竄窈而鬼恠綴歲蕤而成冠點雜錯而為珮出洒泣
而遐驚貫濛鴻而上厲鳳之來兮蔽日鸞之集兮為羣
左昆吾之炎景右崦嵫之卿雲爛七采之炤耀漫五色

之氤氲

一作烟燭

非世俗之習見焉鬼神之嘗聞既而暖碧

臺之錯落耀金宮之瓏玲幻蓮華於繡闥化蒲桃於錦

屏艷丹光而電燵颺翠氛而杳冥軒惘惘於長虹

句從西銘

定本階侘傺於奔鯨惑龍宮之殿稱迷忉利之宮名故靈

偃蹇兮姣服女嬋娟兮可觀秀青色之泯靡曼美目之

波瀾襲日月之纂組襲星宿之羅紈百味酒兮靈之集

河供鯉兮靈之安却交甫之玉質笑陳王之妙顏所以

樂精玄於太乙妙宮徵於清都簫含聲而遠近琴吐音

而有無奏神鼓於玉袂舞靈衣於金裾韻躑躅而易變

律參差而難圖非南方

一作風

之能擬詎濮水之可摹於

是流瀼不一遨曹無邊娥眉既散鐘鼓都捐乘綵霞於
西海駟行雨於丹淵山差池而鏡壑水清明而抱天山
含玉以永歲水藏珪以窮年擬若木以寫意拾瑤草而
悠然遂乃凝虛斂一守仙閑方智寂術盡魄兀心亡白
生不能關其說惠子無以挫其芒原其恥市朝之失道
疾讒孽之不祥却文綵之媼治去利劍之鏗銘懷生死

於半氣惜百年於一光故以鑄金為器丹砂為漿慙宏
既盡妖怨當忘吾師以為可學而公子謂之不良歟

靈丘竹賦

登崎嶇之碧巘入朱宮之玲瓏臨曲江之迴盪望南山
之葱青鬱春華於石岸施夏彩於沙汀遠亘紫林祕堊
近匝玉苑禁垺一作垺於是綠筠繞岫翠篁繚嶺參差黛

色陸離紺影上謚謚而留間下微微而停靖蒙朱霞之
丹氣暖白日之素景故非英非藥非香非馥而珍跨仙

草寶踰靈木夾池水而檀欒繞園塘而櫛蠹既間霜而
無凋亦中暑而增肅每冠名於華戎將擅奇於水陸况
有朝雲之館行雨之宮窗崢嶸而綠色戶踟躕而臨空
綺疏散而停日朱簾開而留風被箇輅之窈蔚結篠蕩
之溟濛或產鳩鵲之右或居露寒之東北皆金輿之所
出入瑶輦之所周通

空青賦

夫赤瓊以炤燎為光碧石以歲凝為色咸見珍於東國

並被貴於西極况空青之麗寶挺山海之不測其所處
則峻巘層石龜穴龍壁素岸成雲潁砂如磧外隱青苔
丹草內伏玉枝瑪瑙銅鉛合生瑯確堅英自非索嶮覓
危乘蠻履螭倦春厭秋斲異鐫竒能得厠於軒寓接君
子之光儀於是寫雲圖氣學靈狀仙寶波麗水華峰艷
山陽谷之樹崦嵫之泉西海之草炎州之烟銀臺之鳥
穆王之馬都廣之國番禺之野皆咫尺八極鏡見四荒
雲烟始出日月既張若夫邃古之世汗漫窈微惟此青

墨所以造之至乃翠燦軒室悲鬱臺殿雜蛟龍之文章
發麟鹿之炳絢騁神形於鐘簏舒怪物與雷電亦有曲
帳畫屏素女綵扇錦色窈一作家鬱綺質蔓衍點拂濃薄
如隱如見山水萬象丹青曲變成百鎰之可珍亦千金
而不賤雖楚之夏姬越之西施趙妃燕后秦娥吳娃溺
愛靡意魂飛心離候青鬃為藻飾方艷紅華與素儀冠
衆寶而獨立信求之而無虧

赤虹賦

有序

東南嶠外爰有九石之山乃紅壁

一作塵

十里青峒

一作峒

百仞苔滑臨水石險帶溪自非巫咸采藥羣帝上下者
皆斂意焉於時夏運始舒春蓀未歇肅飴波渚緩拽汀
潭正逢巖崖相炤雨雲爛色俄而雄虹赫然暈光耀水
偃蹇山頂烏奔江湄迫而察之實雨日陰陽之氣信可
觀也又憶昔登鑪峰

西銘本作
香鑪峰

上手接白雲今行九石

下親弄絳蛭二奇難並感而作賦曰

迺遷礪礪兮太極之連山鯢鱗虎豹兮玉虺騰軒孟夏

氤氲

一作茵蓋

兮荷葉承蓮悵何意之容與兮冀暫緩此憂

年失代上之異人遲山中之虛迹掇仙草於危峯鑄神
丹於崩石視鱸岫之吐翕看龜梁之交積於是紫霧上
河絳氛下漢白日照餘碧雲卷半殘雨蕭索光烟豔爛
水學金波石似瓊岸錯龜鱗之峻峻繞蛟色之漫漫俄
而赤蜺電出蚴蚪神驤曖昧以變依俦一作稀不常非虛
非實乍陰乍光赭赫山頂炤燎水陽雖圖緯之有載曠
代識而未逢既咨嗟而躑躅聊周流而從容想番禺之

廣野意丹山之喬峯稟傳說之一星乘夏后之兩龍彼
靈物之詎幾象火滅而山紅餘形可覽殘色未去耀歲
蕤而在一作生草映青蔥而結樹昏青苔於丹渚暖朱草

於石路霞晃朗而下飛日通朧

一作龍

而上度俯形命之

窘局哀時俗之不固定赤舄之易遺乃鼎湖之可慕既
以為駢翬四羣之駕方瞳一角之人帝臺北荒之際弁
山西海之濱流沙之野析木之津雲或怪綵烟或異鱗
必雜虹蜺之氣陰陽之神焉

四時賦

北客長歎深壁寂思空牀連流

一作流連

圭窬淹滯網絲蔽

戶青苔繞梁春華虛豔秋月徒光臨飛鳥而魂絕視浮

雲而意長測代序而饒感知四時之足傷若乃旭日始

暖蕙草可織園桃紅點流水碧色思舊都兮心斷憐故

人兮無極至若炎雲峯起芳樹未移澤蘭生坂朱荷出

池憶上國之綺樹想金陵之蕙枝若夫秋風一至白露

團團明月生波螢火迎寒春庭中之梧桐念機上之羅

紉至於久陰北邊永夜不曉平蕪際海千里飛鳥何嘗不
夢帝城之阡陌憶故都之臺沼是以軫琴情動憂瑟涕
落逐長夜而心殞隨白日而形削故秦人秦聲楚音楚
奏聞歌更泣見悲已疚實由魂氣愴斷外物非救參四
時而皆難況僕人之末陋也

別賦

黯然銷魂者唯別而已矣況秦吳兮絕國復燕宋兮千
里或春苔兮始生乍秋風兮暫起是以行子腸斷百感

悽惻風蕭蕭而異響雲漫漫而奇色舟凝滯於水濱車

逶遲於山側棹容與而詎前馬寒鳴而不息掩金觴而

誰御橫玉柱

一作訪

而沾軾居人愁卧恍若有亡日下壁

而沉彩月上軒而飛光見紅蘭之受露望青楸之罹霜

巡層楹而空掩撫錦幕以虛涼知離夢之躑躅意別魂

之飛揚故別雖一緒事乃萬族至若龍馬銀鞍朱軒繡

軸帳飲東都送客金谷琴羽張兮簫鼓陳燕趙歌兮傷

美人珠與玉兮豔暮秋羅與綺兮嬌上春驚駟馬之素

沫

一作仰秣

聳淵魚之赤鱗造分

一作攜

手而銜涕咸

一作感一作各

寂寞而傷神乃有劍客慙恩少年報士韓國趙廁吳宮

燕市割慈忍愛離邦去里滙泣共訣別

一作扶

血相視驅

征馬而不顧

一作觀

見行塵之時起方銜感於一劍非買

價於泉裏金石震而色變骨肉悲而心死或乃邊郡未

和負羽從軍遼水無極雁山參雲閨中風暖陌上草薰

日出天而耀景露下地而騰文鏡朱塵之炤爛襲青氣

之烟煴攀桃李兮不忍別送愛子兮沾羅裙至如一赴

絕國詎相見期視喬木兮故里訣北梁兮永辭左右兮

一作顧魄

一作魂

動親賓兮

一作視親賓兮

淚滋可班荆兮增恨

唯樽酒兮敘悲值秋雁兮飛日當白露兮下時怨復怨

兮遠山曲去復去兮長河湄又若君居淄右妾家河陽

同瓊珮之晨照共金爐之夕香君結綬兮千里惜瑤草

之徒芳慙幽閨

一作宮

之琴瑟晦高臺之流黃春宮

一作閨

閱此青苔色秋帳含茲明月光夏簟青兮晝不暮冬釭

一作釭

凝兮夜何長織錦曲兮泣已盡迴文詩兮影獨傷

儻有華陰上士服食還仙術既一作將妙而猶學道已寂

而未傳守丹竈而不顧鍊金鼎而方堅駕鶴上漢驂鸞

騰天蹔遊萬里少別千年惟世間兮重別謝主人兮依

然下有芍藥之詩佳人之歌桑中衛女上宮陳娥春草

碧色春水綠波送君南浦傷如之何至乃秋露如珠秋

月如珪明月白露光陰往來與子之別思心徘徊是以

別方不定別理千名有別必怨有怨必盈使人意奪神

駭心折骨驚雖淵雲之墨妙嚴樂之筆精金閨一作門之

諸彥蘭臺之羣英賦有凌雲之稱辨有雕龍之聲詎作
誰能摹暫離之狀寫永訣之情者乎

恨賦

試望平原蔓草縈骨拱木斂魂人生到此天道寧論於
是僕本恨人心驚不已直念古者伏恨而死假如秦帝
按劍諸侯西馳削平天下同文共規華山為城紫淵為
池雄圖既溢武力未畢方架一作駕黿鼉以為梁巡海右
以送日一旦魂斷宮車晚出若廼趙王既虜遷於房陵

薄暮心動昧旦神興別艷姬與美女喪金輿及玉乘置

酒欲飲悲來填膺千秋萬歲為恨難勝至如李君降北

名辱身冤拔劔擊柱弔影慙魂情往上郡心留

一作存

雁

門裂帛繫書誓還漢恩朝露盍至握手何言若夫明妃

去時仰天太息紫臺稍遠關山無極搖風忽起白日西

匿隴雁少飛岱雲寡色望君王

一作子

兮何期終燕絕兮

異域至乃

一作如

敬通見抵罷歸田里閉關却掃塞門不

仕左對孺人右顧

一作顧弄

稚子脫畧公卿跌宕文史齋志

沒地長懷無已及夫中散下獄神氣激揚濁醪夕引素

琴晨張秋日蕭索浮雲無光鬱青霞之奇意

一作念

入修

夜之不暘或有孤臣危涕孽子墜心遷客海上流戍隴

陰此人但聞悲風汨

一作颶

起泣下

一作血下

沾襟亦復含酸

茹歎銷落湮沉若廼騎疊迹車屯軌黃塵匝地歌吹四

起無不煙斷火絕閉骨泉裏已矣哉春草暮兮秋風驚

秋風罷兮春草生綺羅畢兮池館盡琴瑟滅兮丘壟平

自古皆有死莫不飲恨而吞聲

去故鄉賦

日色暮兮隱吳山之丘墟北風枿兮絳花落流水散兮

翠莖疎愛桂枝而不見悵浮雲而離居廼凌大壑越滄

淵茫茫積水陵陵斷山

一作云云
積水橫斷山

窮陰匝海平蕪帶

天於是泣故關之已盡傷故國之無際出汀洲而解冠

入淑浦而捐袂

一作視

聽蒹葭之蕭瑟知霜露之流滯對

江臯而自憂弔海濱而傷歲撫尺書而無悅倚樽酒而

不持去室宇而遠客遵蘆葦以為期情嬋娟而未罷愁

爛漫而方滋切趙瑟以橫涕吟燕茹而坐悲少歌曰芳
洲之草行欲暮桂水之波不可渡絕世獨立兮報君子
之一顧是時霜翦蕙兮風摧芷平原晚兮黃雲起寧歸
骨於松柏不買名於城市若濟河無梁兮沉此心於千
里重曰江南之杜蘅兮色以陳願使黃鵠兮報佳人橫
羽觴而掩望撫玉琴兮何親瞻層山而蔽日流餘涕以
沾巾恐高臺之易晏與螻蟻而為塵

哀千里賦

蕭蕭江陰兮荆山之岑北繞瑯琊碣石南馳九疑桂林

山則異嶺奇峰橫嶼帶江雜樹億尺紅霞萬里

一作重水

則遠天相逼浮雲共色茫茫無底溶溶不測其中險如

孟門豁若長河參差巨石縱橫龜鼉若乃夏后未鑿秦

皇未闢嶄巖生岸迤邐成迹馳湍走浪漂沙擊石伊孟

冬之初立出首夏以歸來自出國而辭友永懷慕而抱

哀魂終朝以三奪心一夜而九摧徒望悲其何及銘此

恨於黃埃於時

一作是

鴻雁既鳴秋光亦窮水黯黯兮蓮

葉動山蒼蒼兮樹色紅思雲車兮沅北望蜺裳兮澧東
惜重華之已沒念芳草之坐空既而悄愴成憂憫默自
憐信規行之未曠知矩步之已難雖河北之爽塏猶橘
袖之不遷及年歲之未晏願匡坐於霸山

待罪江南思北歸賦

西銘本無待
罪江南四字

伊小人之薄伎奉君子而輸力接河漢之雄才覽日月
之英色絕雲氣而厲響負青天而撫翼德被命而不渝
恩潤身而無極何規矩之守任信愚陋而不肖愧金碧

之琳琅慙丹腹之照耀樊天網而自離徒夜分而誰弔
遭大道之隆盛雖草木而勿履誤銜造於遠國出顛沛
之願始去三輔之臺殿辭五都之城市惟江南兮丘墟
遙萬里兮長蕪帶封狐兮比一作上景連雄虺兮蒼梧當

青春而離散方仲冬而遂徂寒蕪葭於余馬傷霧露於
農夫跨金峰與翠巒涉桂水與碧湍雲清冷而多緒風
蕭條而無端援之吟兮日光迴玃之啼兮月色寒究烟
霞之繚繞具林石之嶙峋於是臨虹蜺以禁室鑿山楹

以為柱上翬翬以臨月下淫淫而愁雨奔水潦於遠谷
汨木石於深嶼鷹隼戰而槽巢鼃鼃怖而穴處若季冬
之嚴月風搖木而騷屑玄雲合而為凍黃烟起而成雪
虎蹯跼而斂步蛟螭轔而失穴至江蘿兮始秀或杜衡
兮初滋桂含香兮作葉藕生蓮兮吐絲俯金波兮百丈
見碧沙兮來往霧蓋蓋兮半出雲雜錯兮飛上石炤爛
兮各色峰近遠兮異象及迴風之搖蕙天潭潭而下露
木蕭梢而可哀草林離而欲暮夜燈光之寥迴歷隱憂

而不去心湯湯而誰告魄寂寂而何語情枯槁而不反
神翻覆而亡據夫以雄才不世之主猶儲精於沛鄉奇
略獨出之君尚婉戀於樊陽潘去洛而掩涕陸出吳而
增傷況北州之賤士為炎土之流人共魍魎而相偶與
蠨蛸而為鄰秋露下兮點劍烏青苔生兮綴衣巾步庭
廡一作燕兮多蒿棘顧左右兮絕親賓憂而填骨思兮亂
神願歸靈於上國雖坎軻而不惜身

泣賦

秋日之光流兮以傷霧離披而殺草風清冷而繞堂視
左右而不孺具衣冠而自涼默而登高谷坐景山倚桐
柏對石泉直視一作眠百里處處秋烟聞寂以思情緒留

連江之永矣蓮欲紅南有喬木葉以窮心蒙蒙兮恍惚
魄漫漫兮西東詠河充之故俗眷徐揚之遺風眷徐揚
兮阻闕梁詠河充兮路未央道尺折而寸斷魂十逝而
九傷歎潺湲兮沫袖泣鳴咽兮染裳若夫景公齊山荆
卿燕市孟嘗聞琴馬遷廢史少卿悼躬夷甫傷子皆泣

緒如絲詎能仰眎鏡終古而若一作如斯況余輩情之所使哉

知己賦

有序

汪本缺

陳國之華者故吏部郎殷孚其人也博而能通學無不覽雅賞文章尤愛奇逸雖志隱巖石而名動京師矣才多深見氣有遠度雖安期千里不能尚焉始於北府相值傾蓋無已僕乃得罪嶠外遐路窈然始還舊都會君尋卒故為茲賦以寄深哀

順祇効寶瀆靈會昌時雨種祉山雲降祥承瑤葉之餘
暖系金枝之末光聳孤韻以風邁騫逸氣以烟翔故學
不常師而心鏡羣籍理不啟問而情炤諸密採圖辨緯
遊璣訪厯潛志百氏沈神六經冥析義象該洽性靈儒
不隱迹墨無遁形既含道潤亦發才華采耀秋月文麗
冬霞有體有艷光國光家識包上仁義兼高行如彼清
波可挹可鏡又象沖室惟清惟淨氣擬北海情方中散
風流未輟盛名猶纂英馳芬激譽流聲滿我筠心而松

性君金采而玉相伊邂逅之未遇爰契濶於朱方丹瓊
譬而非寶綠蘭比而無芳每賞矜其如契貴懷允而不
忘亟閒席兮惆悵屢緩帶而從容論十代兮興毀訪五
都兮異同談天理之開塞辨人道之始終罄龍圖及鳳
書傾蒼冊與篆字儲西國之闕文採東京之逸記閱歆
向之舊旨闡鍾王之新意對楚漢之瞻墨覽魏晉之鴻
策校遠近之真假削古今之名實每齊韻而等逕輒同
懷而共術吐情志而深賞忘年齒而隆眷擬余才兮前

華比余文兮後彥余結袂於山石君憑神於寒霰何遠
期之未從痛哉景其如電堂酒兮一塵暮燈兮萬春黛
草兮永祕朱丹兮何晨聞瑤質兮可變知余采兮一奪
唯華名與芳暉兮爭日月而無沫

傷友人賦

有序

僕之神交者嘗有陳郡之袁炳焉有逸才有妙賞博學
多聞才明敏而識竒異僕以為天下絕倫黯與秋草同
折今不復見矣既而陳書有念橫瑟無從雖乏張范通

靈之感庶同嵇向薦徒之哀乃為辭曰

泣然沾衣兮悲表友之英秀系神緒而作氏肩靈枝而

啟胃轢四代而式昌洎十葉而克茂友人之生川岫降

明峻調迴韻慧

一作惠

志聰情倜儻遠度寂寥靈素文攀

淵卿史類遷固譬如冬雪既潔將似秋月至徹乃上代

而少雙故叔世而曠絕弔蕙若之暫芳慟琬琰之永闕

余既好於斯友乃神交於一顧邈疇年之繾綣竊生平

之遊遇既遊遇兮可尋乃協好兮契心懷愛重於素壁

結分珍於黃金拾一代而笑淺訪古人而求深故高術
而共逕豈異襲而同襟爾挂情於霜柏我發意於冬桂
擘千品之消散鏡百候之衰替帶瑤玉而爭光握隋珠
而比麗披圖兮炤藉抽經兮閱史共檢兮雒書同析兮
河紀既思遊兮百說亦窮精兮萬里愛詩文之綺發賞
賦艷兮錦起罄古今之寶賁殫竹素之琛奇信朝日之
徒晨屬夜星之空移覽秋實於西苑摘春華於東池蚤
同歲於上京未滿年於下國爾湘水兮深沉我前山兮

眇默惟音華與書酒伊楚越兮南北余結誼兮梁門復
從宦兮朱藩何人遙而困阻而天道之匪存凋碧玉之
神樹銷紫石之靈根永遠書於江漚結深痛於爾魂魄
綿昧其若絕泣縈盈其若結差妙賞之不留悼知音之
已逝金雖重而見鑄桂徒芳而被折百年一盡兮貴揚
凝於後烈

傷愛子賦

有序

江亢字肩卿僕之第二子也生而神俊必為美器惜哉

邁閔涉歲而卒悲至躑躅乃為此文

惟秋色之顥顥心結縉兮悲起曾憫憐之慘悽痛掌珠
之愛子形惻惻而外施心切切而內圯日月可銷兮悼
不滅金石可鑠兮念何已緬吾祖之赫義帝高陽之玄
胄惜衰宗之淪沒恐余人之弗構覬三靈之降福竚弱
子之擢秀酷奈何兮肩卿那逢天兮不祐爾誕質於青
春攝提貞乎孟陬謂比方於右列望齊英於前修遷高
行之美迹弘盛業之清猷白露奄被此百草爾同凋於

梧楸憶朱明之在節顧岐嶷之可貴睨鑪帳而多怙瞻
戶牖而有慰奚在今之寂寞失音容之彷彿姊目中而
下泣兄嗟季而飲淚感木石而變哀激左右而隕歎奪
懷袖之深愛爾母氏之麗人屑丹泣於下壤僚慙憂於
上旻視往端而擗慄踐遺緒而苦辛就深悼而誰弭歸
末命兮何陳我過幸於時私爰守官於江潯悲薄暮而
增甚思纁黃而不禁月接日而為光霞合雲而成陰霧
籠籠而帶樹月蒼蒼而架林嗟奈何兮弱子我百艱兮

是尋驗纖帶之夜緩察葆鬢之朝侵惟人生之在世恒
懽寡而戚饒雖十紀之空名豈百齡之能要迅朱光之
映夜湛白露之凝朝指茲譬而取免排此理以自銷然
則生之樂兮親與愛內與外兮長與稚傷弱子之冥冥
獨幽泉兮而永閔余無愆於蒼祇亦何怨於厚地信釋
氏之靈果歸三世之遠致願同升於淨刹與塵習兮永
棄

麗色賦

楚臣既放魂往江南弟子曰玉釋佩解驂濛濛淥水裏

裏青衫乃召巫史茲憂何止史曰臣野

賦楷無野字

膠學蔽

理臣之所知獨有麗色之說耳夫絕世

一作代

獨立者信

東方之佳人既翠眉而瑤質亦盧瞳而頰脣灑

一作錄

金

花於

一作及

珠履颯綺袂與錦紳色練練而欲奪光炎炎

其

一作而

若神非氣象之可譬奚影響而能親故仙藻靈

艷金華玉儀其始見也若紅蓮映池其少進也如綵雲

出崖

一作衣

五光徘徊十色陸離寶過珊瑚同樹價值瓊

草共枝雖玉堂春姬石室素女張烟霧於海際耀光景
於河渚乘天梁而浩蕩叶帝閭而延佇猶比之無色方

之非侶於是彫臺繡戶當衢橫街椒庭承月碧幌延日

架虬柱之嚴麗亘虹梁之峻密錦幔垂而杳寂桂烟起

而清溢女乃耀邯鄲之麗步媚趙北一作北里之鳴瑟若夫

紅華舒春黃鳥飛時紺蕙一作穗初嫩蘋蘭始滋不擘蘅

帶無倚桂旗摘芳拾藥一作藥含詠吐辭笑月出於陳歌

感蔓草於衛詩故一作追夫氣炎日永離明火中槿榮任露

蓮華勝風後簷丹葵前軒碧桐笙歌晚右琴憊池東嗟
靈王之心悅怨漢女之情空至乃西陸始秋白道月弦
金波炤戶玉露暖天網絲挂牆綵螢繞梁氣已濕一作温

兮曉未半星雖流兮夜何央憶襍珮兮且一歎念錦衾
兮以九傷及浮陰一作及乎五陰凋時冰泉凝節軒疊厚霜庭

澄積雪鳥封魚斂河凝海結紫帷鈴匝翠屏環合麝密

周彰燈爐重沓恥新臺之青樓想上宮之邃閣一作閣若

乃水炤景而見底烟尋風而無極霧出吳而綺章雲堆

趙而碧色露辭楚而容裔風去燕而悽惻莫不輟鏡徒
倚擘琴心息於是帳必監田之寶席必蒲陶之文館圖
明月室畫浮雲春蠶度網綺地應紡秋梭鳴機織為駉
衣象奩瓊盤神憑仙丹雕柱彩瑟九華六出翠蕤羽釵
綠秀金枝故言必入媚動必應規有光有豔如合如離
氣柔色靡神凝骨竒經周一作秦歷趙既無其雙尋楚訪
蔡不覲一作觀其容亦可駐髮還質駉星馭龍蠲憂忘死
保其家邦非天下之至麗孰能預於此哉宋大夫耀影

汰迹縈魂洒魄賞以雙珠賜以合璧拂巫盪祝永為上客

水上神女賦

江上丈人遊宦荆吳首衛國望燕途歷秦闕出宋都遍覽下蔡之女具悅淇上之妹未有粉白黛黑鬼神之所無也廼造南中渡炎洲逕玉礪越金流路逶迤而無軌野忽漭而虧儔山反覆而參錯水遶一作澆灌而縈薄石五采而橫峰雲千色而承萼日炯炯而舒光雨屑屑而

稍落紫莖繞逕始參差紅荷綠水纔灼爍忽而精飛視

亂意徙

一作凌

心移綺靡菱蓋悵望蕙枝一麗女兮碧渚

之崖曖曖也非雲非霧如烟如霞諸光諸色雜卉雜華
的的也象珪象璧若虛若實綾錦共文瑤貝合質遂乃
紅唇寫朱真眉學月美目艷起秀色爛發窈窕暫見偃
蹇還沒冶異絕俗奇麗不常青娥羞艷素女慙光笑李
后於漢主恥西施於越王神翻覆而愉悅志離合而感
傷女遂俯整玉軼仰肅金鑣或採丹葉或拾翠條守明

璣而為誓解琅玕而相要情乍合而還散色半親而復
嬌聳輶車於水際亭雲霓於山椒奄神祇之彷彿共光
氣而寂寥於時也綵霞繞繞卿雲縵縵石瓊文而翕艷
山龍鱗而炤爛苔綠根而攢集草紅葩而舒散日炫晃
以朧光樹歲蕤而葱粲無西海之浩蕩見若木之千尋
非丹山之赫曦聞琴瑟之空音理洞徹於俗聽物驚恠
於世心恨精影之不滯悼光晷之難惜閱有無於俄頃
驗變化於咫尺視空同而失貌察倏忽而亡迹野田田

而虛翠水湛湛而空碧廼唱桂櫂凌衝波背橘浦向椒
阿砵砵木石洪漭蛟鼉顧御僕而情饒巡左右而怨多
弔石渚而一歎悵沙洲而少歌苟懸天兮有命永離決
兮若何退以為

西銘本無
此三字

妙聲無形奇色非質麗於嬪

嬪精於琴瑟尋漢女而空佩觀清角而無足嬪楊不足
聞知夔牙焉能委悉何如明月之忌玄雲秋露之慙白
日愁知形有之留滯非英靈之所要術也

娼婦自悲賦

有序

漢有其錄而亡其文泣蕙草之飄落憐佳人之埋暮廼
為辭焉

粵自趙東來舞漢宮瑤序金陳桂枝嬌風素壁翠樓明
月徒秋歌聲忽散傷人復愁君王更衣露色未晞侍青
鑾以雲鬢夾丹輦以霞飛願南山之無隙指壽陵以同
歸俄而綠衣坐奪白華卧進屑骨不憐拉金誰恡九重
已閉一作閤高門自蕪青苔積兮銀閣澁網羅生兮玉梯
虛度九冬而廓處遙十秋以分居傷營魄一作魂之已盡

畏松柏之無餘歸故鄉之末光實夫君之晚滋去柏梁
以淹袂出桂苑而斂眉視朱殿以再暮撫巔一作嬪華而
一疑於是怨帝闕之遂岨悵平原之何極霜繞衣而葭
冷風飄輪而景昃御思趙而不顧馬懷燕而未息泣遠
山之異峰望浮雲之雜色若使明鏡前兮碎孤鴈之錦
翼廼為詩曰曲臺歌未徙黃壤哭已親玉玦歸無色羅
衣會成塵驕才雄力君何怨徒念薄命之苦辛

江上之山賦

潺湲潏溶兮楚水而吳江刻劃嶄崿兮雲山而碧峰挂
青蘿兮萬仞豎丹石兮百重嵯峨兮崑崙如斲兮如削
崑崙兮尖出巖岍兮空鑿波潮兮吐納嶼峰兮積沓鰐
鰓兮赤尾龜鼉兮匱匝見紅草之交生眺碧樹之四合
草自然而千花樹無情而百色嗟世道之異茲牽憂恚
而來逼推爐炭於片景抱絲緒於一息每意遠而生短
恒輪平而路仄信懸天兮窈昧豈繫命於才力既羣龍
之咸疑焉衆狀之所極俗逐事而變化心應物而迴旋

既歎翕其未悟亦繡繡而已遷伊人壽兮幾何譬流星
之殞天悵日暮兮吾有念臨江上之斷山雖不敏而無
操願從蘭芬與玉堅亂曰折芙蓉兮蔽日冀以盪夫憂
心不共愛此氣質何獨嗟乎景沉

扇上綵畫賦

臨淄之雅女宋鄭之妙工織素麗於日月傳畫明於
之綵虹洛陽之伎極江南之巧窮故飾以赤野之王文
以紫山之金空青出峨嵋之陽雌黃出蟠冢之陰丹石

發王屋之岫碧髓挺青蛉之岑粉則南陽鉛澤墨則上
黨松心山乃嶄巖鬱崕路必巉嶙崎嶇嶽馭龍所不遠至
駕鳳未之前尋乃雜族以為此扇為君翳素女與玉琴
玉琴兮散聲素女兮弄情旻天兮舒縹暮雲兮含頽窗
中暖兮露始滴池上凝兮月又明玉琴兮珠徽素女兮
錦衣促織兮始鳴秋蛾兮載飛識桂莖之就罷知蘭葉
之行衰願解珮而捐玦指黃墟而先歸重曰碧臺寂兮
無人蔓丹草與朱塵度俄然如一作而一代經半景若九

春命幸得為綵扇兮出入玉帶與綺紳

燈賦

淮南王信自華淫命綵女兮餌丹砂而學鳳音紫霞沒
白日沉挂明燈散玄陰顧謂小山儒士斯可賦乎於是
泛瑟而言曰若大王之燈者銅華金檠錯質鏤形碧為
雲氣玉為仙靈雙婉百枝艷帳充庭炤錦地之文席映
繡柱之鳴一作鴻箏恣靈修之浩盪釋心疑而永平茲侯
服之誇詡而處士所莫營也若庶人之燈者非珠非銀

無藻無緝心不貴美器窮於樸是以露冷帷幔風結羅
紈螢光別挂蛾命辭蘭秋夜如歲秋情如絲怨此愁抱
傷此秋期必丹燈坐嘆欲說忘辭至夫霜封園橘冰裂
池蓀雲雪無際河海方昏冬膏既凝冬箭未度一作涓

連冬心寂歷冬暮亦復朱燈空明但為傷故乃知燈之
為寶信可賦也王遂讚善澄意斂神屈原才華宋玉英
人恨不得與之同時結佩共紳今子凝章挺秀近出嘉
賓吐衡吐蕙含瓊含珉一作推推一作驂雕輦以愛國之有臣

焉

井賦

汪本缺

穿重壤之千仞兮構玉甃之百節營之不日既汲既漂
金燈草賦

山華綺錯陸葉錦名金燈麗草鑄氣含英若其碧莖凌
露玉根升霜翠葉暮媚紫榮晨光非錦罽之可學詎瓊
瑾之能方迺御秋風之獨秀值秋露之餘芬出萬枝而
更明冠衆藹而不羣既豔溢於時暮方照麗於霜分是

以移馥蘭畹徙色曲池軼長洲兮杜若跨幽渚兮芳蘿
映霞光而爍爍懷風氣而參差故植君玉臺生君椒室
炎萼耀天朱英亂日永緒恨於君前不遺風霜之蕭瑟
藉綺帳與羅袿信草木之願畢

翡翠賦

彼二鳥之奇麗生金洲與炎山映銅陵之素氣濯碧磴
之紅泉石錦質而入海雲綺色而出天峰岑岵而蔽日
樹靜暝而臨泉霞輕重而成彩煙尺寸而作緒熱風翕

而起濤丹氣赫而為暑對滂流之蛟龍衝汶沔之霧雨

耀綠葉於冬岫鏡朱華於寒渚斂慧

一作惠

性及馴心騫

頰翼與青羽終絕命於虞人充南琛於祕府備寶帳之

光儀登美女之麗飾雜白玉以成文揉

一作揉

紫金而為

色專妙綵於五都擅精華於八極傳貴質於竹素晦深

聲於百億嗟乎雞鶩以稻粱致憂燕雀以堂構貽愁既

銜利之情近又遁害之無由今乃依赧火之絕垠出赤

縣之絃州遠人迹而獨立擎天倪而為儔竟同獲於河

雁不俱怨於海鷗必性命兮有當孰能合兮可求

石蚶賦

有序

海人有食石蚶一名紫驚蚌蛤類也春而發華有足異者戲書為短賦

我海若之小臣具品色於滄溟既鑪天而鑄物亦喻化而染靈比文豹而無恤方珠蛤而自寧冀湖濤之蔽迹願洲渚以淪形故其所巡左委羽右窮髮日照水而東昇山出波而隱沒光避伏而不耀智埋冥而難發何弱

命之不禁遂永至於天闕

一作開

已矣哉請去海人之仄

陋充公子之嘉客儻委身於玉盤從風雨而可惜

橫吹賦

有序

驃騎公以劔卒十萬禦荆人於外郊鐵馬煩而人聳色
綵旄耀而士銜威軍容有橫吹僕感而為之賦云

北陰之竹兮百尺而不見日石磴礧礧而成象山沓合而
為一雲遙遙而孤去風時時而寒出木斂柯而攢抗草
騫葉而蕭瑟故左崎嶇右硯礧樹崑崙水泓澄鎮雄蛟

及雌虺馳獨鷗與單鷹白山顥赤山赭匝流沙經西極
原陸窈灌莽深人聲絕馬迹沉寂然四顧增歎累吟雖
欲止而不能禁此竹方可為器迺出天下之英音於是
帶以珉色扣以瓊文潤如沉水華若浮雲赤綬紫駸星
含露分其聲也則鞅鬱有意摧萃不羣迢遙衝一作山

崎曲抱津繇幕順序周流銜呂故西骨秦氣悲憾如懟
北質燕聲酸極無已斷絕百意繚繞萬情吟黃烟及白
草泣虜軍與漢兵於是海外之雲處處而秋色河中之

雁一一而學飛素野黯以風暮金天絕以霜威衣袂動
兮霧入冠弓刀勁兮馬毛寒五方軍兮出不及雜色騎
兮往來還旃如雲兮幟如星山可動兮石可銘功一豎

一作堅

兮迹不奪魂既英兮鬼亦靈奏此吹兮有曲和歌

盡而淚續重一命而若烟知半氣之如燭美人戀而嬋
媛壯夫去而躑躅故感魂傷情獲賞彌倍妙器奇製見
貴歷代所以韻起西國響流東都浮江繞泗歷楚傳吳
故函夏以為寶飾京關以為戎儲至于貝冑象弭之威

織文

西銘刻本
缺文字

魚服之容鄞山錫刃耶溪銅鋒皆陸斷

犀象水斬蛟龍載雲旗之逶迤扈屯騎之溶溶啾寒亮
於前衡嘒陸離於後陣視眇眇而或近聽嘹嘈而遠震
奏白登之二曲起關山之一引吐哀也則瓊瑕失綵銜
樂也則鉉堊生潤採菱謝而自罷綠水慙而不進代能
識此聲者長減淫而何吝

江文通集卷一

欽定四庫全書

集部

江文通集卷二

詳校官監察御史_臣曹錫寶

檢討_臣何思鈞覆勘

總校官庶吉士_臣何思鈞

校對官中書_臣吳裕德

謄錄監生_臣范光謙

欽定四庫全書

江文通集卷二

梁 江淹 撰

詔

北伐詔

門下朕統歷馭政志包函夏庶愍文軌無思不服而逖
焉校虜久為邊虞及宋末不庭授策乖律北州外淪威
風內毀鑒彼隆替慨嘆盈懷晁旒濟河翦彼凶狄咸秩

中岳望祀汾陰則聲教遠矣猶以經綸惟始恩化甫洽
勞民擾衆為政所重故方輟六師按經九伐今淮泗告
驚羽書馳聞醜羯妖燼送死北陲

一作垂

徵天人之數撫

自來之會無勞遠兵剿撲為易蓋因茲大號蕩其巢藪

可遣某官

一作遣使某官

組甲十萬鐵騎千馬斜趣潁洛衝

其要津某官某虎旅八萬舳艫數千沿淮長驅稜威青
汴某官某舟師五萬直出淮肥某官控江右之銳絡繹
繼進某官某率羽林勁勇為水陸形援某官某甲等並

率義勇之衆牙制

一作盡

犄角

一作犄角

之機戎車戒路事宜

惣一使持節都督南徐兗二州諸軍事後軍將軍南徐州刺史長沙王晃出次江都為衆軍節度驍雄競奮火烈風掃尅定中原肅清河洛便可內外纂嚴以時備辦遣使巡行詔

門下昔明王馭世巡嶽采政睿后司朝觀俗調化故生無鬱滯物獲修通墮風拯患於茲為急朕以輜薄昧於大道因璿璣之厯遵三德之運緬鑒前哲寤寐永嘆思

所以闕訪治蠹詢求民瘼才寡務殷若無津際故以情
深危薄心疚夙夜矣可普遣大使分行四方推賢薦能
問疾舉滯若其采野不闕犴訟有虧妨氓利害擾黷政
經者具以奏聞如其謹言嘉話直士奇才亦依名騰上
隨事均量務取厥中朕將親覽以弘遠化

立學詔

門下夫膠庠之典彝倫攸先所以昭振才端啟發性緒
弘世字氓納之軌儀是故五禮之迹可傳六樂之容不

泯朕自膺歷受圖志闡經訓且有司羣僚奏議橫集以
戎車屢警文教未敷思樂辟雍永言多慨今闕燧無虞
時和歲稔遠邇同風華夷慕義便可式遵前準修建黜
學精選儒官廣延國胄

斷募士詔

門下設一作詔募取將懸賞購士蓋出權宜非曰經制頃

者民罹氛藹世襲艱阻因時流故浸以成俗斯風蕩而

未返一作還且滋長逋逸開罪山湖遂乃鯨刑不辱草竊

無咎平政察治萌合甄革自今已

一作以

後可悉斷衆募

慰勞雍州詔

皇帝謝鎮軍寧蠻二府雍州文武士庶等夫忠為令德

或感緊

同慨一作慨

殺軀信實美行或殉義蹈節而沈攸之

小豎反覆稱逆西藩表粲劉秉潛使相扇遂擁據石頭

並圖廟社粲秉既從王憲蒼黎同慶攸之孤州蟻聚勢

必燼滅刺史張敬義氣雲騰秣馬星驅全羽十萬殄茲

氛鯨曾不旋踵彼州南陽白水將相遺風忠烈

一作義之

士霜戈電發但戎車暫動念原未寧冬寒卿皆無恙

賜赦交州詔

門下交部昔值時諉負海不朝因迷遂往歸欵莫由今

創制萬寓烟煨造物原刑四裔澤浹中畿愍一作慙彼邊

氓未均王化宣弘遠仁蕩以更始可曲赦彼州統內咸

同曠泰李叔獻一人即撫南土其股肱文武詳材選推

並遣大使宣揚朝旨

曲赦丹陽等四郡詔

門下朕興言民瘼昧旦求政所以庶存簡惠緝茲治道
而玉燭未調祥風尚鬱京輔及三吳昔歲水災秋登既
罕今茲厲疾罹患者多納隍之嘆為矜良深可曲赦揚
州所統丹陽吳興南徐州所統義興等四郡其遭水尤
劇之縣自今年以前三調未充而虛例已畢官長局吏
應共備償者雖即事為愆情在可亮外詳所除以弘優
澤

大赦詔

門下朕思弘風教而刑圖猶積永言前列兢歎載懷今
履端告始羣后執贄治洽樂郊華夷同泰雖和慙擊石
采愧卿雲然景業初基義深恒典慶動玄靈歡溢都縣
憫彼幽黔猶隔茲澤思我兆民共熙至化

王儉為左僕射詔

門下端貳樞祕實惟國禎緝典宣機所寄時彥尚書右
僕射領吏部尚書南昌縣開國公儉器懷明亮風情峻
遠業積珪璋才兼經緯况乃節亮帷幄譽敷端揆升授

之宜蓋允具瞻可左僕射

王儉領太子詹事詔

門下管司東朝歷代所重自非國華莫允斯任侍中尚書左僕射南昌縣開國公儉鑒識清瞻理懷秀澈績亮朝端譽敷僉議贊業攸光物聽斯緝宜惣二官以穆彝序

王鎮軍為中書令右光祿詔

門下綸言要密歷選為難優秩崇顯允在舊德使持節

都督江州豫州之新蔡晉熙二郡諸軍事鎮南將軍江
州刺史延之業履冲約秉情閑素譽彰頻試績著累朝
自居南服徽庸尅舉宜升寵章管兼樞祕

張令為太常領國子祭酒詔

門下庠議既敷縉紳攸屬師氏之任宜歸儒素散騎常
侍中書令驍騎將軍揚州大中正緒器識清簡理懷恬
約譽洽朝聞聲緝民聽必能闡揚玄宗式範胄子兼掌
宗伯望實惟宜

何詹事為吏部尚書詔

門下官人之職實難其選所以弼諧彝品謨明庶績今
思治惟急彌不可曠侍中太子詹事戢業履修平體識
詳穩自升宮闈美譽咸聞必能無懈于位燮茲流序

王撫軍為東安吳興詔

門下震澤殷奧撫馭須才都官尚書撫軍潯陽郡開國
公敬則志幹貞烈秉情開敏忠勤之志形乎出內必能
綏懷大邦尅隆美政可安東將軍吳興太守

王光祿為征南相州詔

門下衡岳名區荆湘奧壤自頃凋弊綏撫須賢侍中光祿大夫丹陽尹僧虔德履淹邃識局詳正沖素之品朝望攸歸厯職之庸載懷僉聽往往任沅湘餘惠在民今宜重敷善政申此懿績

柳僕射為南充州詔

門下河兗衝要維扞中畿司牧之任宜詳其授後將軍領軍新除尚書左僕射涓陽郡國公世隆業體淹濟思

情通敏功書王府績彰累任必能宣弘恩政威懷萬里
雖哀疾毀頓而禮有權奪

王侍中為南蠻校尉詔

門下荆楚殷曠任重寄深毗佐之選非良勿授侍中領
祕書監驍騎將軍負秉心貞元志局開亮績譽之美在
公屢彰必能贊政南紀播惠西夏

王僕射加兵詔

門下散騎常侍尚書左僕射太子詹事南昌縣開國公

儉忠款昭著任寄隆深既光朝猷允屬民聽宜增威飾
以崇望實可加兵二百

褚侍中為征北長史詔

門下蕃佐須才非良莫寄侍中領步兵校尉炫識業清
悟思懷淹暢出內之譽日聞其美宜弼諧親屏以申茂
績

封江冠軍等詔

門下締基緯業序功攸急開歷闡祚酬庸為先故以式

鵠曩書載炳前軌文仲等或誠亮艱危効彰屯設皆績
幹兩宣勤圖兼立宜各分珪社酬厥勞謚

蕭冠軍進號征虜詔

門下維翰之重實資名品使持節都督郢州司州之義
陽諸軍事冠軍將軍郢州刺史南昌縣開國侯鸞體局
弘濟器操端敏自蒞任夏首美政殷流必能聿宣國化
以庇人瘼宜崇顯秩允茲聲望

教

為建平王聘隱逸教

府州國綱紀夫媯夏已沒大道不行雖周惠之富猶有
漁潭之士漢教之隆亦見棲山之夫迹絕雲氣意負青
天皆待絳螭驤首翠虬來儀是以遺風獨扇百代餘烈
激厲後生斯乃王教之助古人之意焉吾稅駕舊楚憩
乘汀潭挹於陵之操想漢陰之高而山川遐久流風無
沫養志數人並未徵采善操將棄良用慨然宜速詳舊
禮各遣纁招庶暢此幽襟以旌蓬蓽

建平王赦五刑教

府州國綱紀吾謬紕朝組廼班恩命重渥華蕃踐寵懋
甸永言政惠良攬清寐況舊楚地曠前郢氓殷水帶枉
渚山西魯陽自頃田邑榛故封井萊蕪財賦方屈犴獄
實繁思所以厚風釐俗變瑟改調自五歲刑以一作已下
未送臺者一皆原遣文武彈坐亦悉復職主局依舊施
散薄紓此懷

為蕭太傅東畊教

三府二州綱紀夫寶農賤貨綵炤周滕巡畊去販光炎
漢錄故能業滋都野產殷絃縣吾任屬弘寄思闡治源
慮以晨感情以宵嘆今玄司調氣青祇佇節陳關既柔
服關方秀電爍有期桐萌無遠便當躬速紺耦道先列
辟事均暫勞迹在永豫可尅日備辦詳典施行

為蕭驃騎發徐州三五教

府州綱紀沈攸之背慢靈極稽誅之日久矣況稱兵江
漢之上圖讐廟闕之下惡熾罪盈民靈所絕朝廷以尅

辰纂嚴令輿夙駕吾任先貴近義兼常慨挺刃投袂信
見其時方當水斬龍蛟陸斷犀兕雖烈士銜志壯夫投
槩然雲羅既舒宜廣威防所統郡縣便普三五咸依舊
格以赴戎麾主者飛火施行

為蕭驃騎築新亭壘埋枯骸教

府州綱紀夫汝南稱慈諒由掩骼廣漢流仁實存殯朽
近築製茲營崇壘浚塹古墟曩墟時有湮移深松茂草
或致刊薙憑軒動懷巡隍增愴宜並為收改勿毀莫祀

主局詳辦施行

表

拜中書郎謝表

榮鬱兩臨恩微交鏡悄然擘魂廼懼廼逝臣聞汝潁之
金或揚采於四豪江淮之珠已馳光於七貴皆聲不妄
美第豈虛立未有伎慙相輿蒙送目之賞工謝綵輪竊
歸風之價臣幼乏篆刻長睽圖史智罕効官志闕從政
方遽求振風長憂凌雨不悟遭社鳴之屬際河清之會

玄雲素霞必駕蓬萊白羃駢鱗咸蒙解遂仕通物任官
登郎掾此實耀靈之私照而微臣之厚幸也仰惟皇衢
大融氣品呈觀西傾棧山東鯁航海故奇士端威異人
罄折皆相望北闕待詔南宮而臣學無利博文有忤害
廼影裾預展伏黃扉之右曳纓轉笏居青璫之前訪德
於姑射聞道於崆峒伊臣之願過為信矣昔望都才麗
爵之上班長岑聞靡身終下秩愚臣方古悠然已泰內
燭徘徊眇不識屆

拜正員外郎表

臣邁鄉遠迹由學末徒不瑩雕龍之采寧照玄豹之飾
自過被光私濫蒙恩幸屢度經冬亟移春序皇緯如紐
慙飛塵之効璿基方峻謝寒露之勤故宜伏影軒間卷
氣衡下猶蒙供事紫楹奉役丹殿巡魄擎概榮渥不晤
震離徹邃阿景洞幽復昇官清閨列版嚴闥嚴識何算
爰忝叔則之仕菲質焉樹廼謬仲容之職猥枉青釭增
光空質心懷末塵情慙洞戶佇首矯迹以銘以奏

為建平王慶明帝疾和禮上表

臣聞慶動至玄則昌衢敷序教孚上雲則紫寓交泰故
祁寒溽暑無以變其和沴火凝陰不能徙其氣伏惟陛
下至德遐穆實天縱聖仁鑄蒼岳道括寰海故丹陵之
君歛金泥而謝賢媯墟之后眷龍圖而慙德頌聲蔽達
歌思匝道而望景暫虧輪光少曖玉櫺違和金幌輟念
百祠未遑四嶽匪處吉蠲為慶神御方休瑞廣文齡祥
深武日具惟涵教欣愉兼薦臣班戚奉慈實自慶舞不

勝悅豫之情

建平王慶安城王拜封表

麗采繩河映萼璿圃淑問夙孚令儀早晰撰告候辰昭
膺輝序國維富禮皇塗凝衛具生屬慶懷識戴躍臣涵
悅楚邊魂馳闕闕不任下情

建平王之南徐州刺史辭闕表

臣過承寵靈閔點暇日徒抱皇慈無充橫草而品第廼
崇軒服逾峻顧茲覲躬彌觀荒昧今便奉官外甸卷迹

徐山託慕宸嚴載惟感戀哀疾不獲詣闕不任窮鯁之情

建平王讓右將軍荊州刺史表

茂寵廼臨炫奪彝典巡恩鏡飾攬情震慮

中謝

臣聞該秩

詔序匪賢莫能孚其職端維裂陝非功無或濫其選所以輪鞅國典締結民紐五威咸平四精或訓者也臣踐行迷方試業敝緒徒以綴采宗享承渥帝席執珪戴筆亟荷出內至乃曳組河縣蔑馴羽之化鳴環京轂謝擇

鱗之政聲績兩無風化雙缺而龜紐未別璽書頻降復
改冊相區分瑞衡服竟無賈琮交部之廉終乏郭伋井
壤之信固以雜沓民明湫隘身諷不悟皇靈再輝河海
重渥遂踰恒采妄賁異等荆門務要方城任積水交沅
澧山通岷峨襟帶百縣縈抱七州上德懋勲勘居斯地
寧臣膠固所宜膺荷是以焦薄魂色驚迫心影謹刷睿
情置露弱志伏願陛下傳旒弛珙暫炤瑣曲則鑄才式
弘練物惟遠王度既清蒙識以泰不勝慙懔屏營之情

為蕭驃騎讓封第二表

臣某言寫滌愚丹已續前表猥降前詔未垂鏡恕一省

驚慙再悻魂府靜躬自察啓居匪地

中謝

臣聞日薄星迴

昊天無以爽其節山盈川沖厚地不能虧其度豈不靈

鑄有限神極無爽況世道恒淪人彛剽奪數滿必沿虛

飾小故亂大臣才非古賢任鈞左戚祚開山河兼金疊

組爵侈

一作李

常班寵溢前達以榮以渥且慙且覲雖嘉

銘鼎之恭更懼循墟之速矧乃三司業貴上將地崇慙

錄務廣河汾寄深珪寓方啟劍衛增肅既驚朝野足震
城邑殷周富士猶難其人漢魏多才亦罕兼職且麟閣
之臣尚有位不及鉉全器之侯猶或任不並台名爵無
假前世之雄規車旗勿濫中葉之英軌況鴻誥鬱集懋
冊頒萃諒非虛薄輕所膺符今殷夏既聲封國式固故
天地燁燿日月更輝陛下停若鏡之明流如雲之愛方
求士於版巖宜思賢於屠肆而私臣以闡廟寵臣以惟
鼎位兼文武職惣內外非所以發夢渭濱儲精河數一作

欽 鐫金刻石既不可詮興歌里頌

一作誦

其謂臣何仰緣

大道方行蒼祗宅氣威靈所燭九功咸詠寧於庸臣獨
隔恩耀誓守愚衷重扣雲日如蒙恩宥實生之幸不任
慙歎之誠

為蕭驃騎讓封第三表

臣某言臣再抽慙請辭為理屈側守圭漏伏望衷鑑而
宸緯嚴祕襟襟悰徒懸優獎之降非復常旨肅奉驚懷曠
曉如失

中謝

臣炤冊訪古誦史稽昔以為敷道之寄管物

成務愬錄之重匡績毗風莫不下協河岳上踵光緯先

王所以長世後睿所以字氓

一作民

纘

一作讚

金圖之要輔

樞歷之機者也臣本瑣姿不慕聞達昔值英世頻講時

來感激光私未能自返烏可超乘厚任妄據高圖天道

既平鬼神好譙臣亦何人而獨斯處所以不恤色忤頻

犯鴻威者正以方圓之景已滿丹彩之色難加政能緯

俗匪務傍職坐而燮道必在其人若臣武未屬

一作燭

橐

鞬

一作鞬橐

之分文不藹樽俎之間德非時秀道乖物宗虛

飾疲伍空貽上位則天變彰於飛流地眚見於震壓驚
蕩民聽蕪沮物議綸言之出不追金石之謬已遠豈唯
敗錦傷經毀鼎覆餗而已哉自非西京上績東都名勲
河右羣賢江左諸彥寧有誣叨天爵以為已功者也昔
南楚偏君鄢郢小政執珪柱國尚不輕授況車軌共文
四溟同宅而以鄙蔽超居金鉉殊任鬱起臣心憂魄悚
視丹如綠伏願陛下暫停冕纁少察愚實鑒臣醜情慙
臣孤志廣天下之惠可匹夫之諒則國步永清門下永

無謬悞不任憂駭之情

為蕭驃騎錄尚書事到省表

臣某言臣自妄蒙異寵輕荷殊爵晝昃猶聳夜艾方驚
誠以設器瑤陛取監沖滿懸魄金波徵驗虧闕茲乃天
數去盈人經好退后所以裁成萬品下所以各慎百司
未有違才易貫克負永業者也且量力之誥實炯前書
辭科之誨且昭昔牒况臣徒竭弱質忠貞未懟一作對猶
叨今恩山岳非重故慙屬交喪頻煩表疏必謂巡崖之

懃不忽俟河之清可期不悟皇明神邈鴻獎彌深雖守
丹愚競絕燭怨今輒耀纓上序鏘珮中軒德輕施重左
右生華志盡輸謝終愧報効不任下情

為蕭驃騎讓豫司二州表

臣某言臣傾心駐氣不蒙睿感憂警交鏡中寐再驚

中謝

臣聞國厯惟燿則藩伯緝其才朝緯伊序則方率司其
度用能璿紐弗虧民教可變者也臣自少器業無聞弘
大誤變燕鼎超憑吳舟託翰負組假翼要瓊質圖玄素

文寫青牘爵富諸公任高羣彥銓梁既失輻誚所湊雖
仄影毗道徇身贊德朝微不昭民聽具溢豈非性力知
限鑒度有崖乘茲而處猶懼忝辱之恥況此以任何堪
湧溢之賜且董督條興皆非盛古至乃河襄初授或體
兼上才江表廣任或功為物首臣績陋於國不勤睿朝
寵集若是非所克取終抱寸襟重露愚見伏願天鑄廣
裁地靈厚載特垂蠲渥使不矜盈則藿質蓬性庶無矯
奪不任匪晏之情

為蕭驃騎上頓表

臣某言伏見明詔鑾輿便御親六師臣又謬愍羣帥竊聞金火告耀昏明代卷雲雷既湊經綸相襲所以草昧縣寓昭晰區宙况乃逆徒阻兵器掩西服雖蟻衆鼠竊勢必褫散然尋初難貸原煙易滅臣受算內楹稜威外閭按甲視夕沾襟待旦翦此凶渠庶匪曠旬但遂玉輅躬臨雲蹕親駕悚慨交心實百常憤今便嚴率所統尅此月二十六日出次戎郊故已望江源以軫嘆想荆山

而增厲矣進止之宜更聽勅旨不任悚企匪寧之心

為蕭驃騎謝慰勞表

臣某言即日侍中祕書監臣戢至奉宣詔旨慰勞便受

轂中帷練甲外壘旂旄

一作麾

蔽景興徒競氣人懷秋嚴

士蓄霜斷晦魂已掩氛豎未懸稽鉞竚威寢興震慨今

王

一作玉

臨郊皇華降庭輝耀望實將激威武戴鵬之

夫迎光蹠恩投石之師攀炤竦惠楚續越醪方茲慙潤

臣忝屬間私彌抱渥洽不任下情

為蕭驃騎慶平賊表

臣某言狂賊沈攸之棄天犯紀毀禮滅緯外陵南畿內
曩西夏稟血涵氣咸百讎憤賴皇威遐制璿圖廣馭四
海競順其會如林仰綴宗稷之靈俯輯士民之効故嚴
勅裁交妖鋒折首凱期既屆樂飲在晨斯乃紫厯方永
蒼氓同慶臣備符寵私時深抃舞不任踴躍之情

為蕭驃騎解嚴輸黃鉞表

臣某言逆沴電熾凶妖霧舒志大禋天情已類社故乃

馳羽江郊驚燧山甸雖藏智審其黥戮涵識判其奔沮
然兵扈難輕義險宜備故膺寵無辭奉鉞不讓今元凶
既殪醜徒自紊朝霽方卷郢氛已廓樂瑄登肆禮衣曳
朝不宜復假殊服取缺彝則輒上還王府永戢祕館

為蕭驃騎讓油幢表

臣某言奉詔賜車一乘竊以國容方穆旗章式序朝禮
永清儀服咸貫故象革建鑣尚炯周圖朱箱玄蓋猶炤
漢篆皆旌羽勿差功庸匪濫臣忝爵山重蒙榮海深襲

恩祇冊已慙初筮浮祿素位方疚心路鑒古以惕巡世
罔然不宜假文丹慙空飾阜輶仰思至道俯恤物僭伏
願聖遠特停華渥書愚上請追深累懼不任下情

為蕭驃騎謝甲仗入殿表

臣某言臣即日被勅賜給甲仗五十人入禁儀武殿飾
冠疇典局荷此盛恩五情銘載臣聞國之利器在祀與
戎蘭錡之設實允儲方故官騎辰居羽林天部瞰城龍
塞言伏鬼方臣股肱之力不足以染丹青橫草之勤寧

可以鏤金石而魚服象弭一旦虛授誕錫金珪方茲為
絢黃河如帶比今非賞故異寵之襲心魄共驚不世之
服蒼祗同灼雖攀靈河漢駿奔明哲慙迹駭衷無情以
處

為蕭驃騎讓太尉增封第二表

一作第三表
此與下篇敘次

照西銘
定本

臣某言以鉉司崇貴袞位淵嚴非德非功無忝無溢故
誓魂肆請舒衷仰謁不能曲流慈炤遂乃徒洽恩獎周

覽未交靈爽以懼

謝中

臣歷古汾圖循遠訪繪未嘗不麗

選袞台妙簡槐采者也魯鄭之賢戚曹蕭之勲彥吳鄧

之盛功王鍾之素業孔明之居蜀茂弘之在晉

僉曰一作

皆僉

伊人是以處無懦色臣官逢昌世運漸時明頻煩

紫渥綢繆璿命身薄施厚感厲愈深遂負機繩之託猥
集衡梁之任風軌不樹徽猷罕宣無以式翦冠兆載弭
茲萌致虹沴阻於上京蛻妖扇於下國實賴藩伯勦旅
侯甸入守櫓槍旬始煙祛霧卷故皇道威稜之由神緯

昭昌之効臣豈有探賈察幽之智攻城野戰之力哉今
迹無小功事貽大賞愧寤終朝慙夢流夜咨此庸弱何
以任忝伏惟淮泗猶梗趙魏未賓中原久蕪神州方翳
思樂盛猷願厲聲頌將陪雲驂以北狩扈朝服以濟師
乃為少雪庸誠微謝天眷耳寧容遽竊茂爵輕頒鴻名
者乎伏願聖渥遐覃賜以矜宥需焉垂仁穆然惠德血
祈旦亮慙志夕滿雖蹈疵戾猶深抃躍

為蕭驃騎讓太尉增封第三表

一無第三二字
敘次在前表之

上

臣某言撰心求私精衷請亮情不感神理無動天詔飾
既降辭表是絕朱紱方臻金鉉未宥魄慮再馳詵然改
席臣局志久戰淺繫已領具煩寸管備黷尺史曠旬浹
景祈指遂宜猶謂設品分職實以仰銓璧緯列寵縣榮
故乃俯酌瑤陛迹聯盈缺道協興降上睿所以僉舉前
英所以詳能今若第隨私貴爵與私富紊蕩邦經斷折
民紀豈可還風中葉遜聽遐代者也臣才乏往賢績謝

古烈妖烽孽火將炎天地幸郊甸或靜江山以閱文軒
華劔既榮既峻侯封桂食又盈又滿祿高誚厚任重責
深弱節兼誠誓思不淺伏願隆慈特垂明愍臣奉國猶
家慮公若私秉軸之鈞心希在治不任懇懇之情

為蕭太尉上便宜表

臣某言臣聞經邦緯治去華為急體國字民循素乃安
聖誥遺風具騰丹冊賢言流沫備宣青史何嘗不翦削
浮奢銷遺文繪然後頌音載興澤洽式廣楚駕百馬民

雜國彫秦修萬騎教亡業陸刻楠丹楹禮有常序朱轡
卓蓋古無濫秩縹衣綸綬漢置前制奇服怪物周設常
刑皆節俗約訓反樸還風肅政黎心釐一民志故禮奢
寧儉宣尼之高風以義止利孟軻之宏規若乃文彩利
劍道鑒其元彫蟲篆刻世炤其淺雖儒墨異學名法各
治至於遵本捨末其槩一也故荀韓之立典管晏之制
書賈陸之鴻筆嚴徐之博辭食貨興志鹽鐵生論莫不
異說而同儉乖議而共治然世淪物起道缺事遷蓋源

起西秦波被東漢一魏不變二晉未革所從來者遠矣
洎高祖武皇帝業高縣寓化格區宙菲躬謙度方追重
華納麓之勤約情撝操乃取文命卑宮之義去金錦之
巧無帷帳之飾唯修遠圖綏國之術祈勸力耕濟世之
規是以政平刑偃紫階斯廓太祖文皇帝恭已明堂一作
臺之上聽政衢室之下九官咸靜萬績惟凝亦復務抑
華詡思裁參太輿馬翠翟之麗眇登乎外禁瑤碧綺組
之玩罕設於內宮故大德立而五路謚鴻名建而四民

寧者也自頃政教日替敦教月虧誰惟厯稔亦曰淹紀
至乃帝臺傾海外之寶王城盡天下之祕象席珠履一
躡而即收鏤琴綵瑟再撫而已損褻衣隨塵而罷羅袂
從風而棄百民染其聲奢萬姓被其馳蕩故闔閭之里
富者竊梁楚之乘伎巧之家豪者襲王公之服於是有
文靡虛麗驕邪不典之器精纖空飾妙蠱非常之玩農
夫勤耨不充浮伎之資蠶女務織無給點刻之費將恐
去實就華未知所屆背源從流不識其止求國富兵強

寧可得乎今江南所宅止漢魏兩州之地戶口所檢裁
文景三郡之民舊齊故魯鞠為茂草全趙盛魏豺狼所
嗥陞下方欲鳴鑾中土朝服濟河不改斯術則未見其
可也臣謬屬大任竊同憂泰日晏宵分實忘饑寢草治
其芳職此為先輒具條便宜可以安邦利民者事事如
右率以聞見謹簡聖聽若其咸允謹請勅付外施行

為蕭讓太傅揚州牧表

崇絕之寵降自白日殊甚之禮墜於青雲祇畏驗盛若

奪魂鑒巡席無容當軒改色

謝中

臣聞天地之大德曰生

聖人之大寶曰位將以啟廓靈緯崇樹神紀百司備列
貴賤之分既炳九官咸贊升降之際可明故皇極不爽
國步斯泰雖金媯各政姬華異治未有革序變倫而能
流英發耀者也臣才慙右賢功愧上烈平趙夷魏之氣
無宣於國書濟河登山之威未亮於左史既罕龍韜金
匱之効又乏楹間帷中之績衛主寧謂提橫流匡危不
足生細民故小節時顯於艱難大勲無紀乎廊廟而乘

軺服冕荷蕭張之賞開城裂域受曹鄧之爵不能翊教
緝政釐濟氓隱贊邦弘化飾整朝輝是以德少寵多輿
人立規才薄位厚處士興議故玉燭未調道治猶鬱者
臣之為媿也不悟陛下復停日月之華凝煙露之潤擢
臣瑣安鑒臣陋誠前恩未曠後寵已襲上公祕鉞聲振
都鄙文劍雕烏禮殊軒殿深褒之逮方今為絕大賚之
降比古為超臣亦何功當處斯忝伏願道邈先帝理鏡
衆寂被氣順方涵生獲慶特輟策書時停鴻冊則人歌

僉平物抱至歡

為蕭重讓揚州表

臣某言臣以功挾賞峻世詰所譴才弱寵隆道經所諱
故寫魂誓膽庶留天矚圖驕慮滿護守私吝不能青蘋
引風陽燧要景復降綸冊徽采兼明影迹交戰水煙相
薄竊聞周夏異章方素各禮儒道二宗名墨兩教咸以
裕俗為急僉以得人為寶於是尊官上品乃貽玉振之
賢鴻等懋列為取金聲之彥或有濟世夷難之略輝耀

內區導江疏山之勤纏結中寓深德行溢大功振驚然
後超居國右鬱處朝端故九職惟宣六典式序丹青所
以傳其藹馨管所以揚其音也臣才蔽識淺非集譽於
鄉曲榮降寵臻乃假翼於皇極遂事等話言之寄任鈞

符

西銘本
遺此字

負圖之重職惣表裏地聯機務位班昔良知

闕前修居官不聞其風處秩焉見其政衆域之治未緝
街縣之訟方興繒販之士無薦管庫之家寂寞四維不
闡五教罕敷一作聞安可以底慎財賦交正庶土者也今

輟和毗道仄身贊業尚據晦曉獲毗璇圖況異禮更飾

策命復崇

一作從

名超列辟爵擬羣后上仁居之猶涵慙

德臣實空儒伊何以勝既誣人文將黷玄緯凌厯飛流

之青懼失正和晦裂蜺霧之災且濫庶

一作世

物臣是以

寤寐永嘆憂國慮私者也伏聞陛下裁天賦品制地平

施使曠世之典不遂臻於末躬迴代之軌無損被於茲

日素心丹魄皦然靡疚矣不任憂迫之情

為蕭三讓揚州表

一作後讓太傅揚州表

臣某言臣再辭非謙重讓靡飾實以爵高中世歷古所
難寵冠上台繇代誰易詳圖辨箴如鏡如水檢崖覽志
匪雕匪文魂祈夢請駐心挂氣陛下猶降以璽書之榮
被以丹碧之采頓然變容一慮九逝謝中臣以為寒暑繇
乎平分晦明驗乎天道咎譽起於微薄得吝生於小疵
故金衡既陳錯髮之異必縣銅墨咸設分撮之殊已傾
聖哲不能爽鬼神莫由避況臣鄙槩早盈陋才久溢第
超庶后禮絕羣班仰贊東序之賓平參北宮之政窮盈

極滿於斯為甚鑒茲隆替淵永非譬所以坐洞房而不
悟下輕帷而嘆息也古之馭教當有道焉量能而受賞
撰智而錫位深乃裂組遠故分珪前人以為稱首昔賢
以為美詠自非上德橫乎天地高績格於區宇烈譽馥
於一時茂名鬱乎當世者豈有降今日而莫先哉臣爰
蒙殊寄六稔遂交及荷慙任二耀一作耀通與曜同忽周末能
塞謗生民獲免僮訟何盛勲之足題詎深烈之可銘乎
而因委忝濫踰溢倫等朱軒躍馬光出電入貂冠紫綬

寵靄霞炤臣聞闔宗奉國猶非報殉方將身侍鑾華雪
齊魯之侵地手執羈勒驚燕趙之遠郊然後追迹范張
濯纓汾射臣之志也華爵盛典非所敢寧伏炤古巡將
流聖察無使匹牒血誠不諒於璿宸宏芬英猷遂蕪於
里聽豈伊庸臣獨蒙其庇亦曰海隅咸被其利焉

為蕭拜太尉揚州牧表

張本缺

方文既降雕牒增輝禮謁前英寵華昔典仰震威容俯
慙陋識心魂戰慄若殞若殯謝中臣景能驗才無假外鏡

撰已練志久測內涯故讓不飾迹辭非謙距寸亮尺素
頻觸瑤纈丹情實理備塵珠冕而宸居寂阻九重嚴絕
徒懷漢臣伏闕之誠竟無魯人迴日之感所以迴懼鴻
威後奔殊令者也既而永鑒隆魏緬思宏晉國之大政
在功與位故治民紐亂不處輿臺之下去勲捨德寧班
袞司之上咸以休對性業裁成器靈詎有移風變範尅
耀倫序者乎臣績不炤朝忠豈宜國名爵赫曦倂優
忝陛下久超異禮之榮越次殊常之秩雖寢寐矜戰曲

垂哀亮而璽冊沖正愈賜砥礪今便肅順天誥恭聞睿
典審躬酌私必跋危撓將恐氓俗由此方擾軌訓以之
交蕪臣豈不勉智罄忠也未知所以報奉淵聖輸感霄
極取諸微躬長為慙荷

為蕭太傅謝侍中敦勸表

臣某言即日侍中臣惠基給事黃門侍郎臣王僧珍至
朱監乘雲玄軒肅霧墜高天之旨集微臣之軀神爽矍
然斂影無地謝中臣初長血心未啟素縶辭從意空言隨

事盡不能降陛下一時之恩借俄頃之炤遂枉近侍貂
簪軼庭臣自亮無庸何以集此退咎慊誠悲枉垂光進
戒朝訓虧茲盛序感慮躑躅縈結夢寐臣檢古少例巡
令逾疑豈有妄叨天功虛竊上賞近謬國華坐取隆貴
人見其過外惜皇猷內畏私青昔西京鼎秩漢世權家
丹墀網戶擊鐘連騎何嘗不以驕滿貽戾謙沖要福者
哉臣不能遵煙洲而謝支伯迎雲山而揖許由激昂榮
華之間沈潛珪組之內光飾既超寵靈亦遠江左已來

罕見其倫今位冠朝端通侯萬戶結象弭於前衝

一作衝

奏金管於後陣都野宗其榮盛視聽敬其災貴臣一旦
居之誰以為不忝者乎而陛下猶崇以異禮者是增臣
之戾也况復肅延華勸實深窘迫伏願俯矜單志賜遂
前請則世寢橫議臣蒙緩責

為蕭重讓尚書敦勸表

臣某言臣五寫丹翹宜蒙凝炤一降王人遂無蠲察復
遣尚書臣岱兼侍中臣奐等奉宣慈靈重賜勉誨鏡伏

迴環惘然失圖心魄交據淵谷非譬

中謝

臣自初被詔迄

於今時載慙載疑以悚以厲豈非深懼鴻典永憂末躬
故琴瑟徒鳴不傳廣樂之響燈燼空舉焉續景星之耀
何則卓乎小者不足以任大守於蔽者不可以語通臣
器乏淵源識暗機務倫濟夷險每憑璿厯之遠龕折氛
蜺輒資羣才之効臣寧有採奇鑒隱之能網國提民之
功乎不謂過延渥洽謬攀河漢榮宗盭盭寵華緯映藉
聲探議共知其幸况傳保之崇殷周特貴牧司之寄魏

晉稱重上昭妙德次擬英勲有踰茲序尠不紊裂今陛下方闢金門之聽調繡宸之政何得去禮廢雅近於臣始既無前章孰表後世臣才孤位峻待罪無日矣情哀理感事盡於斯伏願一運天景微見藿心則物不逃形臣何恨焉不勝焦憂狼狽之至

為蕭太傅謝追贈父祖表

臣某言即日兼謁者僕射姓名奉宣詔書追贈臣亡祖某太常卿亡父某為散騎常侍特進左光祿大夫寵煇

泉扃恩凝松石奉渥銘心祇光慟慮

謝中

臣行阻祇玄躬

早荼棘如創之痛旻日不遑終身之恤霜露彌感雖慙
曾輿喬木之敬實抱仲路華轍之哀自謬藉珪金空貽
組紱爵侈於公祿盈於私何嘗不靜欵其結默慕交深
不悟睿孝動天昭性曠古惠被遠紀澤演慶世丹請靡
諒峻冊愈凝大榮集身尚驚異施况寵洽山柏特振殊
造銷骨瀝命猶不勝謝不任鯁泗荷珮之誠

為蕭讓劍履殊禮表

臣某言近仰謁威靈辭移理奪故欲冒忝傳識必避殊

禮不悟復疑令詔雕飾非常鏡睇未周金火交慮

中謝

聞寵以昭賢不濫才外之華榮以麗身豈謀分表之渥

哲后所以僉授貞臣所以慎荷故行珪行玉尚無輕頒

一爵一號猶宜詳品况劍舄升陞贊唱異儀殆為對越

神體抗禮天極漢魏舊載唯斯稱重雖英衮蓬朝賢武

滿世蒙此典者乃曠古時降耳諒由功饒賞結名高器

深金蟬綠綬未足

一作可

藹其采瓊珮朱紱不足宣其榮

方加以履殿優以勿趨雖至第為上公貴為皇王佇望
茲禮猶邈如也臣何燁業寵兼昔人受以懼覆悔豈有
及復聞殊旨增其憂迨抱此愚款以賓為請伏願天鑒
順臣所守一作受則雖歿九幽傳榮萬葉矣

為蕭太傅讓前部羽葆鼓吹表

臣聞國容軍禮旌羽昭其華品騎第乘鸞凝鵠其飾所
以炎耀仙都崇麗神境世教以之垂彩民聽以之流文
故勒岫銘海之功鞞革寫其詠龕難夷邦之業簫管凝

其聲朱鷺玄雲既錫上德華山芳樹以頒奇勲爰及台
賢位高藩戚名沿恩炤寵垂私賞皆為發吹後陣豈曰
兼奏前軒茲典罕行此禮實曠臣竊服已弘叨光無限
才局祿遠常銜炯耀安可二葆同整雙弄頓驚覽躬惕
然特貽厚謬伏願明燦日月靡忘情鑒將停盛飾遂臣
慚心則涵惠既饒恭錫多矣

為蕭太傅謝

一作
辭

輿駕親幸表

臣某言近以神輿將降昌啓丹辭重被還旨未垂闔允

謙尊彌光褒優愈臨慙疚既積敢忘謙請臣乘幸藉私
豈曰無僭攀霞鏡月非復常所此必讓德信在於茲但
恩嚴交洎固守莫從免默恭典伊榮加戚寧容爰枉鸞
駕式驚臣府訪心驗已諒以不夷求物校迹誓無此義
且古今異節紫青變禮取諸臣躬一作功未覲其安伏願
陛下賜止冕輅時停雲駕則俗踐知方臣蹈厚泰

謝開府辟召表

臣某言近被詔旨賜令臣府自辟僚賢竊聞治以才為

寶教以人為貴激風揚蕤實資山東之英凝華重馥良
在關西之彥近以闡耀世經發麗朝序而州策郡聘茲
禮尚堙台召鉉辟斯文亟暖豈非盛美難嗣故曠寂先
芬者哉臣謬贊國機職宜永鑒未能澄形炤藝薦品任
官既乖覆業彌感深寄仰屬皇心遙覃察政洞俗弘此
懿典崇臣遠寵輒仰一作祇睿恩謹宣巖壑庶幽居之士
蘿薜可卷奇武異文無絕於古

為蕭上銅鐘芝草衆瑞表

臣某言臣聞象際玄通豈以明昧咀運幽崖遙鏡不以人靈異謀威書壁詰既信其綠綠鱗丹字彌驗其文是以業鵠鴻經則煙露呈炤精昭景緯則川岳發華故寶鼎白雲瑞集軒世芝房赤雁祥委漢年玄石鴻鐘遠炳晉室玉璧彝器近耀皇宗自大明乘規泰始疊矩朱鬚素毳之至史不絕書奇葉珍柯之獻府無虛月今懋歷啓圖靈基再固頃歲以來禎應四塞近獲豫州刺史劉懷珍解稱所統建寧郡建寧縣昌村民於萬山中採藥

忽聞異響從石上得銅鐘一枚長二尺一寸遠象古鑄
近乖今製又州界之內樹生連理二木隔澗滕枝相通
越壑跨水合為一幹方之舊說彌復為貴宣城所統臨
城縣山中獲草一株交柯攢莖紫蓋黃裏貞潤晬晬自
然天華採掇歷時質色不變

下缺
四字

炳據有徵近獲吳興

太守臣王奐云十一月二十九日解所統長城縣令臣
張撫解稱其月二十五日甘露降縣東界下山之陰又
東太守臣腦解所統武進令臣紀法宗云十一月十日

解稱其月二十四日甘露降於彭山松樹至九日又降
如初臣以祥緯雜沓星燭波連斯乃靈迹深覃睿衷負
感理應寫順祇無涵祕稽往徵古僉欣升泰瑤光日闡
玉繩永休謹拜表遣兼長史參軍臣姓名奉銅鐘芝草
以聞

為蕭讓太傅相國齊公十郡九錫表

備九錫之禮

西銘定本無此句
此句上疑有闕文

非常之冊分天而降冠

古之典開河而出遙然以慙魂交象魏

中臣聞日月權
謝

與二儀所以克靈君臣設極三統所以式固惟生與位
謂之大寶辨諸文而尊卑既炳觀羣龍而貴賤可正雖
復殷因於夏王資於帝至乎建侯分職體國經野其揆
一焉是以二周之始山河愈廣兩漢之初封賞彌盛然
表東海者實牧野之日瞻魯邦者乃負圖之辰西都英
相信命世之功闕中上宰亦龕亂之力拒鬯彤弓本西
伯之賞虎賁戎路又晉公之典若乃衣裳盟會九合一
匡猶慙德斯禮也臣實鄙才靡識大體徒以忠貞為緊

而勞不足銘雖以丹素為誠而功無可勒豈有經天緯地之略探隱炤寂之智哉抑亦何術以堪盛休是以覽雲際而懷古憑軒視而未寧也伏惟陛下神華馭世理無不鏡賜臣待謗今職守其私滿則天下有道庶人不議一作疑矣

為蕭讓九錫第二表

臣某言臣近厲心罄辭寫情畢議眇望神藻鑒見丹襟而帝閭以祕綸詰方明中外卷容左右軫慮中謝臣以為

麗天秉經君上之彛憲儀地執緯臣下之恒軌故皇極
載凝庶士交慎昔者重黎効官裁居炎冥之職羲叔能
任方掌日月之序至乎御龍勤夏未聞冠俗之爵大彭
翼商豈見超世之典以古先哲后如茲之慎賞也臣乃
謬貽國寄志在靖難若夫野戰虹蜺伏順者易為威城
攻鯨虺奉國者理必全雲氣薄蝕下民咸貴更明恃險
輿馬舟中皆可異議故昌邑有歸邸吳楚無旋師斯激
芬揚黷物同其幸焚惡去醜世共其庇實為仰憑俯順

之効臣亦何力之有焉竊謂祿為十郡必俟禹迹之勤
錫以九命乃須周公之美況呂梁不鑿而器重玄珪越
裳未獻而賦擬千乘京闕識其崇貴畿服知其忝冒鏡
前修而慙形覲往德而聳慮畏崖之請取譬深水審量
之祈呈炤皦景伏願陛下遠牽雄範近覽英規憑霞停
詔臨風輟恩豈伊愚臣方被昌化具日遺氓咸蒙其賴
矣

為蕭謝百僚敦勸表

一作被百僚
敦勸受表

臣某言臣欵誠素履頻載黜翰天飾高獎累降史筆即

日尚書臣某等至重宣詔旨猥辱百僚省睇未交心靈

已悸

中謝

臣聞良宰謀朝不必借

一作惜

威貞臣衛主修已

則足故驕滿之失取鏡函闕謙側之美見炤伊闕臣本

庸人識無遠度值開闢之辰遭攬槍之運奸回內曩則

戮力瓊都諸侯放命則抗節瑤祀秉號仗義幸不辱威

皆為冕旒遙鑒之明羣士畫圖之助臣寧望伊摯叔旦

之爵呂牙申甫之賞哉方欲謝替東都濯冠汾陽不悟

盛禮華典復臻於茲靜默迴環祇畏躑躅猶謂遇聰明
之朝當時雍之世陛下詠堯風之化歌卿雲之詩日月
華采萬方獲性疊慮仰祈必蒙題品而威嚴竊絕斯冀
遂阻鑾輿玉駕復許敦幸重臣愆悔無地自安便當謹
恭鴻命竭身為限

蕭相國讓進爵為王表

臣結慮歸請三辰未鏡傾魂仰視九天彌阻重炳徽策
再晰光誥理晦情震若涉嚴淵

謝中

臣業不出世績未逮

古謬藉明政陳力就列艱多智寡翊贊罔樹若乃洪範
不修鍾繇旒之日九黎亂政當摧軸之辰雖瀝命奉時
禍提下亟防明之陋貽慙昔人杜險之蔽取愧前英故
十萬之師無集豪街之邸千金之貴恒單白藏之府戈
船發於江湖戎車出於石城然後雲徹席卷虔劉巨禍
臣實慙焉不悟上賞亟降華爵必集雖延首紫局翹意
宸居執為守約之志既謝簡鑒避賢辭智之請終無開
允故受任專征遠邇知寵肇封四履侯甸推禮昔虞思

勤夏不列殊物之錫晉叔匡周豈頒上公之典燕藩懿
親裁蒙袞舄之榮梁國戚屬方忝旌旗之貴而臣包括
庶揆惣納儀刑蓋出近古非三代之遠體也乃踰九命
爰超五等域中之稱麗天作則探情顧抱豈所允安者
哉伏願陛下下一檢丹崖遂臣慙心無使怵迫深貽疵戾

為蕭相國拜齊王表

臣無佐夏匡殷之功威晉服楚之績業不題於宗器聲
靡記於彝典而超居上禮邈乘峻爵靜念隆替焦原非

譬中謝臣以為衆官咸事帝謨所以式序羣后克讓王猷

所以載穆況臣訪德語勤未泊伊稷之能藉靈懷寵仍
濫周召之秩故駐魂仰請瀝意歸聞理竭素牒事罄丹
史具徽太微備簡玉繩而才輜志淺隔景絕炤朱輪之
使一作史日月亟紆金鑾之尊旦夕將拂巡情覽識豈伊
寧處今便肅典內軒恭服外屏大夫有命古或無違王
假有廟今臣為叨三省空懦震據於心

為齊王謝冕旒諸法物表

臣王言以軒冕雲蹕既非常之飾宮懸玉戚乃配天之

禮故呈襟効慮必期蠲亮重被還旨芳訊愈越鏡伏殊

私情影遠震

中謝

昔大啓營丘未脩

一作備

樹羽之賞光宅

曲阜始兼龍旂之貴況道狹慶隆身薄器尊粉繡爭輝

藻火競耀夫太常圖列星之彩華蓋觀古人之情所以

聳絕百縣崇隔萬寓鳳閣因此而神瓊都由茲而麗故

醜功慙德

一作慙德愧功

違議

一作儀

避榮誠不遙孚理無負達

遂貽嚴

一作器

詰爰斷辭表驚慄遲迴祈鑒何地便當肅

對王休敬昭異寵佩服盛文以慨以懼

為齊王讓禪表

陛下遠規唐虞永揖之典近慕漢魏高謝之禮既覽金
水昏明之數又協雲雷隆替之徵激風太上扇采至公
聞命驚爽心靈殞越

謝中

臣聞天地草昧而樹之君所以

平對二儀顯臨萬國膺符受歷惣明司幽軒轅陟祚首
出庶物顯頊登庸作為民紀雖五德迭興十代繼運非
賢非睿莫預斯位若乃

一作
乃若

與能之交禪錫之會豈伊

虛薄所可遵

一作尊

擬昔傳巖佐商秩終上公礪溪翼周

名極列伯臣才非若人

一作半古

功愧遠

一作逮

聖獄訟不往

謳歌寧歸河之馬圖之寶天無乘龍之錫元首股肱誓

不可異而曠乘之軌忽臻於茲慙慨憂灼罔識其際伏

願陛下遺舜禹之心臣守巢由之節則道耀

一作耀

日月

澤浸飛泳聲震開闢仁動今古四三王而六五帝不亦

休哉

章

為始安王拜征虜將軍南兖州刺史章

絢服騰炤懋冊凝芬
夤對迷墜慙泣交集

謝中臣職右南

陽謝蒲鞭之政任重
臨淄無遣獄之化自
分金帝闕參風尹訟
譬緯裁復圭露詎淹
不悟旻靈拂采霄景
汰色復交書河楚置
傳江吳環章清潤旂
文肅路寵艷內維榮
炫外圍方梗名慮有
陋享識沖生覲氣安
以輸謝不勝荒震屏
營之情

為始安王拜征虜將軍丹陽尹章

既耀軒禮涵凝襲

一作襲

恩爽泗醜默

中謝

臣少識猶晦哀

辛方襲藉以毓采上霄搏華中漢飲惠延光偁爵假息
不悟瑤離降映繩河低文遂翊言闕禁徒第京部進憲
蒙淺塵素徒盈還迷懷悚風製罔樹循伏憂歛滅慮燿
衷不勝荷佩之情

為建平王拜右衛將軍荊州刺史章

珪冊停徽車旗寫曜襲禮炫衷迎恩震色

中謝

臣聞爵以

能委命以績降亦有玄雲結吹衷成燠之厚朱箱累輶

崇試宰之高而臣紐組頒守要玉備政績廢江區聲隘
河部浮榮曠年叨光賒日諒以具察輿歌取鏡民誚不
悟皇德至凝亭物惟幄復使承官楚封祗秩漳土任班
河冀事亞靖陝橫術輻湊殷民訟積寧曰明哲疇克勝
寄雖滙丹局終懼蒙咎不任銘戴匪處之情

為建平王慶少帝登祚章

上書皇帝陛下伏承肇嗣天震雲飛璿極戎夏歸服民
靈以戴謝中臣聞黃旗紆藻瑞益於姬帝紫雲垂蓋効異

於劉后實乃深賜天衷廣映祇迹伏惟陛下騫英駕聖
涵靈縱睿矩心明裁繩道詰時遙裔維符雜沓河紀是
以膺符寶宮輯命珍殿誼洗雲密德徽媯夏濬發鴻原
長禘偉業方絢聲金圖騰華玉厯波渰下氓炎躔上漢
臣公享締寵誠兼親屏禮升之日守官楚甸不獲勉躬
儲外奉顙行間魂泣江郊心泣京國不任悲仰哽慰之
情

為建平王慶王太后正位章

上書王太后殿下伏承以今日淑辰曾光樞景慶芬祇

外禮蔚寰中

謝中

臣聞道懋第昌業廣祉盛藻秩攸臻憲

章斯飾伏惟殿下柔明固天夙資龔懿芬惠

一作
蕙

翔聲

端簡散譽冠采摯姪騰耀太

一作
殿

如丹陵溫德玄丘棲

聖煙煥國牒衍溢民聽涵道席教且詠且洽臣忝任蕃
圉無由隨例闕廷不勝荒情

為建平王慶江皇后正位章

上書皇后殿下伏承以嘉月蕙時膺曜宸正翠珩昭品

綸組在飾休遍函夏譽殷靈昧中謝伏惟殿下岳曜靜德

式懷謙順升降圖傳左右書

一作詩

史夙鏡茂資早摘芳

訓故以騰馥祕閨寫問中帷今靈緯載升崇正輝典行
教紫庭麗軌華屋聲激綺組風偃家邦黎玄湊仁雲祇
宅慶遠邇有聞莫不傾渥臣限外任無由恭列軒屏不
勝荒情

為蕭領軍拜侍中刺史章

上書皇帝陛下即日詔書以臣為侍中驃騎大將軍開

府儀同三司班劍三十人等持節都督如故峻命在庭
光冊充軒虹駟聳服朱轡佇蓋黃對以懷心影若傾中謝

臣功乏至道不足以題象魏績非振民無可以書廟閣
半漏未晏中鐘而驚實忌微庸起乘盛服竊疑國寵損
萃末躬今寰海順典瓊都咸光調御惟新鎔製就始良
宜整變獻經詮明典緯九河式耀三辰載晰不悟陛下
皇靈曲溢大賚斯降而鴻賞之行廼於臣始非所以騰
振遙風激昂品流與人之誦具聞其黷頻露慙祈未叨

鑒順今便虔禮青軒謹躬丹墀憂符怵惕慙屬兼軫不
任屏營之情

為蕭拜相國齊公十郡九錫章

殊命寶典鬱降雲天采詔綺軒光流城廩震驚華禮神
氣交越中謝臣才謝深英氣慙遠度進寡兵車召陵之盟

退靡朝歌河內之會無東馬山戎之績懸車流沙之功
故望寵未安踐榮加懼况納陞朱戶事絕羣班金璽綠
綬儀參鴻典聞命屏營以憂以墜近申微款日月之鑒

既阻方懼難慊蘭芳之旨愈峻遂致百辟卿后踟躕於
衛闕鑾輅旂旂方幸於臣府悵然遙慮將一作知貽厚戾
文章徒單迄無竭省而天威咫尺丹懷罔固輒肅恭文
物翹拜榮禮違距以深追增一作憎沐迫德輜寵盛於斯
為微非臣鄙虛所能酬對



江文通集卷二